

四庫全書

史部

欽定四庫全書

金史卷四十六

元中書右丞相總裁托克托等修

志第二十七

食貨一

戶口

通檢推排

國之有食貨猶人之有飲食也人非飲食不生國非食貨不立然燧人庖犧能為飲食之道以教人而不能使人無飲食之疾三王能為食貨之政以遺後世而不能

使後世無食貨之弊唯善養生者如不欲食啖而飲食  
自不闕焉故能飢飽得其宜可以疾少而長壽善裕國  
者初不事貨殖而貨食自不乏焉故能制豐約之節可  
以弊少而長治金於食貨其立法也周其取民也審太  
祖肇造減遼祖稅規模遠矣熙宗海陵之世風氣日開  
兼務遠畧君臣講求財用之制切切然以是為先務雖  
以世宗之賢儲積之志曷嘗一日而忘之章宗彌文蚩  
興邊費亦廣食貨之議不容不急宣宗南遷國土日蹙

汙池數畧往往而然攷其立國以來所謂食貨之法犖犖大者曰租稅銅錢交鈔三者而已三者之法數變而數窮官田曰租私田曰稅租稅之外算其田園屋舍車馬牛羊樹藝之數及其藏鏹多寡徵錢曰物力物力之徵上自公卿大夫下逮民庶無苟免者近臣出使外國歸必增物力錢以其受饋遺也明安穆昆戶又有所謂牛頭稅者宰臣有納此稅庭陞間諮及其增減則州縣徵求於小民蓋可知矣故物力之外又有舖馬軍須輸

庸司吏河夫桑皮故紙等錢名目瑣細不可殫述其為  
戶有數等有課役戶不課役戶本戶雜戶正戶監戶官  
戶奴婢戶二稅戶有司始以三年一籍後變為通檢又  
為推排凡戶隸州縣者與隸明安穆昆其輸納高下又  
各不同法之初行唯恐不密言事者謂其厲民即命罷  
之罷之未久會計者告用乏又即舉用其罷也志以便  
民而民未見德其行也志以足用而用不加饒一時君  
臣節用之言不絕告誡嘗自計其國用數亦浩瀚若足

夫歷年者郡縣稍遇歲祲又適不足竟莫詰其故焉至  
於銅錢交鈔之弊益有甚者初用遼宋舊錢雖劉豫所  
鑄預廢亦兼用之正隆而降始議鼓鑄民間禁銅甚至  
銅不給用漸興鑛冶凡產銅地脉遣吏境內訪察無遺  
且及外界而民用銅器不可闕者皆造於官而鬻之既  
而官不勝煩民不勝病乃聽民冶銅造器而官為立價  
以售此銅法之變也若錢法之變則鼓鑄未廣歛稅無  
方已見壅滯初恐官庫多積錢不及民立法廣布繼恐

民多匿錢乃設存留之限開告計之路犯者繩以重罰  
卒莫能禁州縣錢艱民間自鑄私錢苦惡特甚乃以官  
錢五百易其一千其策愈下及改鑄大錢所準加重百  
計流通卒莫獲效濟以鐵錢鐵不可用權以交鈔錢重  
鈔輕相去懸絕物價騰踊鈔至不行權以銀貨銀焚又  
滋求亦無策遂罷銅錢專用交鈔銀貨然而二者之弊  
乃甚於錢在官利於用大鈔而大鈔出多民益見輕在  
私利于得小鈔而小鈔入多國亦無補於是禁官不得

用大鈔已而恐民用銀而不用鈔則又責民以鈔納官  
以示必用先造二十貫至百貫例後造二百貫至千貫  
例先後輕重不倫民益眩惑及不得已則限以年數限  
以地方公私受納限以分数由是民疑日深其易交  
鈔為寶券寶券未久更作通寶準用銀并通寶未久復  
作寶泉寶泉未久織綾印鈔名曰珍貨珍貨未久復作  
寶會汜無寧歲而金祚訖矣歷觀自古財聚民散以至  
亡國若鹿臺鉅橋之類不足論也其國亡財匱比比有



之而國用之屈未有若金之甚者金之為政也常有卹  
民之志而不能已苛征之令徒有聚歛之名而不能致  
富國之實及其亡也括粟開糴一切掊克之政靡不為  
之加賦數倍豫借數年或欲得鈔則預賣下年差科高  
琪為相議至推油進納濫官輒售空名宣勅或欲與以  
五品正班僧道入粟始自度牒終至德號綱副威儀寺  
觀主席亦量其私而鬻之甚而丁憂鬻以求仕監戶鬻  
以從良進士出身鬻至及第又甚而叛臣劇盜之效順

無金帛以備賞動以王爵固結其心迨重爵不蔭則以  
國姓賜之名寔混淆倫法斁壞皆不暇顧國欲不亂其  
可得乎迨夫宋絕歲幣而不許和貪其淮陽之蓄謀以  
力取致樞府武騎盡於南伐額爾克時全之出初志得  
糧後尺寸無補三軍債亡我師壓境兵財俱困極竟無以  
禦之故志金之食貨者不能不為之掩卷而興慨也傳  
曰作法於涼其弊猶貪作法於貪弊將若何金起東海  
其俗純實可與返古初入中夏兵威所加民多流亡土

多曠閭遺黎惴惴何求不獲使於斯時縱不能復井地  
溝洫之制若用唐之舊業口分以制民產倣其租庸調  
之法以足國計何至百年之內所謂經畫紛紛然與其  
國相終始耶其弊在於急一時之利踵久壞之法及其  
中葉鄙遼儉朴襲宋繁縟之文懲宋寬柔加遼操切之  
政是棄二國之所長而併用其所短也繁縟勝必至於  
傷財操切勝必至於害民訖金之世國用易匱民心易  
離豈不由是歟作法不慎厥初變法以抹其弊祇益甚

焉耳其他鹽筴酒麴常平和糴茶稅征商榷場等法大槩多宋舊人之所建明息耗無定變易靡恒視錢鈔何議田制水利區田之目或驟行隨輟或屢試無效或熟議未行咸著于篇以備一代之制云

戶口金制男女二歲以下為黃十五以下為小十六為中十七為丁六十為老無夫為寡妻妾諸篤廢疾不為丁戶主推其長充內有物力者為課役戶無者為不課役戶令民以五家為保泰和六年上以舊定保伍法有

司減裂不行其令結保有匿姦細盜賊者連坐宰臣謂  
舊以五家為保恐人易為結構而難覺察遂令從唐制  
五家為鄰五鄰為保以相檢察京府州縣郭下則置坊  
正村社則隨戶則衆寡為鄉置里正以按戶口催督賦  
役勸課農桑村社三百戶以上則設主首四人二百以  
上三人五十戶以上二人以下一人以佐里正禁察非  
違置壯丁以佐主首巡警盜賊明安穆昆部村寨五十  
戶以上設寨使一人掌同主首寺觀則設綱首凡坊正

里正以其戶十分內取三分富民均出顧錢募強幹有

抵保者充人不得過百貫役不得過一年

大定二十九年章宗嘗欲

罷坊里復以主首遠入城應代妨農不便乃以有物力謹愿者二年一代

凡戶口數計帳三

年一籍自正月初州縣以主政主首明安穆昆則以寨

使詣編戶家責手實具男女幼年與姓名生者增之

死者除之二月二十日以寔數報縣二月二十日申州

以十日內達上司無遠近皆以四月二十日到部呈省

凡漢人渤海人不得充明安穆昆戶明安穆昆之奴婢

免為良者止隸本部為正戶凡沒入官良人隸官籍監為監戶沒入官奴婢隸太府監為官戶當收國二年時法制未定兵革未息貧民多依權右為苟安多隱蔽為奴婢者太祖下詔曰比以歲凶民饑多附豪族因陷為奴隸及有犯法徵償莫辦折身為奴或私約立限以人對贖過期則以為奴者竝聽以兩人贖一為良元約以一人贖者從便天輔五年以境土既拓而舊部多瘠鹵將移其民于泰州乃遣皇弟昱及族子宗雄按視其地

昱等莛其土以進言可種植遂摘諸明安穆昆中民戶  
萬餘使宗人博勒和統之屯種於泰州博勒和舊居於  
按春水至是始遷焉其居寧江州者遣實登札克丹阿  
爾托歡錫勒塔干等四穆昆挈家屬耕具徙于泰州仍  
賜博勒和耕牛五十六年既定山西澤潞諸州以上京  
為內地則移其民實之又命耶律佛德以兵護送諸降  
人於渾河路以皇弟昂監之命從便以居七年以山西  
諸部族近西北二邊且遼主未獲恐陰相結誘復命皇



弟昂與貝勒索歡等以兵四千護送處之額東惟西京民安堵如常且命昂鎮守上京路既而上聞昂已過上京而降人復苦其侵擾多叛亡者遂命貝勒綽爾台往戒諭之比至而諸部已叛去又以明安詳衮瑠珠所領歸附之民還東京命有司常撫慰且貸一歲之糧其親屬被虜者皆令聚居及七年取燕京路二月盡徙六州氏族富強工技之民於內地太宗天會元年以舊徙潤隰等四州之民於瀋州之境以新遷之戶艱苦不能自

存詔曰比聞民乏食至鬻子者聽以丁力等者贖之又詔貝勒愛實拉曰先皇帝以同姓之人昔有自鬻及典質其身者命官為贖今聞尚有未復者其悉閱贖之又命以官粟贖上京路新遷置寧江州戶口貧而買身者六百餘人二年民自鬻為奴者詔以丁力等者交易之三年禁内外官及宗室毋得私役百姓權勢家不得買貧民為奴其脅買者一人償十五人詐買者一人償二人罪皆杖百七年詔兵興以來良人被畧為驅者聽其

父母妻子贖之熙宗皇統四年詔陝西蒲解等汝蔡州  
歲飢百姓流落典顧為驅者官以絹贖為良丁男三匹  
婦人幼小二匹世宗大定二年詔免二稅戶為民初遼  
人佞佛尤甚多以良民賜諸寺分其稅一半輸官一半  
輸寺故謂之二稅戶遼亡僧多匿其寔抑為賤有援左  
證以告者有司各執以聞上素知其事故特免之十七  
年五月省奏咸平府路千六百餘戶自陳皆長白山錫  
馨察遜河女直人遼時簽為獵戶移居於此號伊勒敦

部遂附契丹籍本朝義兵之興首詣軍降仍居本部今  
乞釐正詔從之二十年以上京路女直人戶規避物力  
自賣其奴婢致耕田者少遂以貧乏詔定制禁之又謂  
宰臣曰明安穆昆人戶兄弟親屬若各隨所分土與漢  
人錯居每四五十戶結為保聚農作時令相助濟此亦  
勸相之道也二十一年六月徙銀山側民於臨潢又命  
避役之戶舉家逃於他所者元貫及所寓司縣官同罪  
為定制二十三年定制女直奴婢如有得力本主許令

婚聘者須取問房親及村老給據方許聘於良人是年

七月奏明安穆昆戶口懇地牛具之數明安二百二穆

昆千八百七十八戶六十一萬五千六百二十四口六

百一十五萬八千六百三十六

內正口四百八十一萬二千六百六十九奴婢

口一百三十四萬五千九百六十七

墾田一百六十九萬三百八十頃有

奇牛具二十八萬四千七百七十一在都宗室將軍司

戶百七十口二萬八千七百九十

內正口九百八十二奴婢口二萬七十八

八墾田三千六百八十三頃七十五畝牛具三百四德

呼勒唐古二部五姓戶五千五百八十五口十二萬七

千五百四十四

內正口十萬九千四百六十  
三奴婢口一萬一千八十一

墾田萬六

千二十四頃一十七畝牛具五十六十六二十五五年命

宰臣禁有祿人一子及農民避課役為僧道者大定初

天下戶纔三百餘萬至二十七年天下戶六百七十八

萬九千四百四十九口四千四百七十萬五千八十六

章宗大定二十九年十一月上封事者言乞放二稅戶

為良省臣欲取公牒可憑者為准叅知政事伊喇履謂

憑驗真偽難明凡契升奴婢今後所生者悉為良見有  
者則不得典買如此則三十年後奴皆為良而民且不  
病馬上以履言未當令再議省奏謂不拘括則訟終不  
絕遂遣大興府治中烏克遜仲和侍御史范楫分括北  
路及中都路二稅戶凡無憑驗其主自言之者及因通  
檢而知之者其稅半輸官半輸主而有憑驗者悉放為  
良明昌元年正月上封事者言自古以農桑為本根商  
賈之外又有佛老與他游食浮費百倍農歲不登流殍

相望此末作傷農者多故也上乃下令禁自披剃為僧  
道者是歲奏天下戶六百九十三萬九千口四千五百  
四十四萬七千九百而粟止五千二百二十六萬一千  
餘石除官兵二年之費餘驗口計之口月食五斗可為  
四十四日之食上曰蓄積不多是力農者少故也其集  
百官議所以使民務本業廣積儲之道以聞六月省奏  
北京等路所免二稅戶凡一千七百餘戶一萬三千九  
百餘口此後為良為驅皆從已斷為定六年二月上謂



宰臣曰凡言女直進士不須稱女直字卿等誤作迴避  
女直契丹語非也自今如分別戶民則女直言本戶漢  
戶及契丹餘謂之雜戶十二月省奏天下女直契丹漢  
戶七百二十二萬三千四百口四千八百四十九萬四  
百物力錢二百六十萬四千七百四十二貫泰和七年  
六月勅中物力戶有役則多逃避有司令以次戶代之  
事畢則復業以致大損不逃之戶令省臣詳議宰臣奏  
舊制太輕遂命課役全戶逃者徒二年賞告者錢五萬

先逃者以百日內自首免罪如寔銷乏者內從御史臺外從按察司體究免之十二月奏天下戶七百六十八萬四千四百三十八口四千五百八十一萬六千七百九十九戶增於大定二十七年一百六十二萬三千七百一十五口增八百八十二萬七千六十五此金版籍之極盛也及衛紹王之時軍旅不息宣宗立而南遷死徙之餘所在為虛戾戶口日耗軍費日急賦歛繁重皆仰給於河南民不堪命率棄廬田相繼亡去乃屢降詔招復業者免其歲之租然以國用乏竭逃者之租

皆令居者代出以故多不敢還興定元年十二月宣宗  
欲懸賞募人捕亡已而復慮騷動遂命依已降詔書已  
免債逋更招一月違而不來者然後捕獲治罪而以所  
遺地賜人四年省臣奏河南以歲饑而賦役不息所亡  
戶令有司招之至明年三月不復業者論如律時河壩  
為疆烽鞞屢警故集慶軍節度使溫特赫達言亳州戶  
舊六萬自南遷以來不勝調發相繼逃去所存者曾無  
十一碭山下邑野無居民矣

通檢推排通檢卽周禮大司徒三年一大比各登其鄉之衆寡六畜車輦辨物行徵之制也金自國初占籍之後至大定四年承正隆師旅之餘民之貧富變更賦役不均世宗乃下詔曰粵自國初有司常行大比于今四十年矣正隆時兵役竝興調發無度富者今貧不能自存版籍所無者今為富室而猶幸免是用遣信臣恭寧軍節度使張宏信等十三人分路通檢天下物力而差定之以革前弊俾元元無不均之弊以稱朕意凡規措條

理命尚書省畫一以行又命凡監戶事產除官所撥賜之外餘凡置到百姓有稅田宅皆在通檢之數時諸使往往以苛酷多得物力為功宏信檢山東州縣尤為酷暴棣州防禦使完顏永元面責之曰朝廷以正隆後差調不均故命使者均之今乃殘暴妄加民產業數倍一有來申訴者則血肉淋漓甚者即殞杖下此何理宏信不能對故惟棣州稍平五年有司奏諸路通檢不均詔再以戶口之多寡富貴輕重適中定之既而又定通檢

地土等第稅法十五年九月上以天下物力自通檢以來十餘年貧富變易賦調輕重不均遣濟南尹梁肅等二十六人分路排推二十年四月上謂宰臣曰明安穆昆戶富貧差發不均皆自穆昆內科之暗者惟胥吏之言是從輕重不一自幹罕叛後貧富反復今當籍其夾戶推其家貲儻有軍役庶可均出詔集百官議右丞相克寧平章政事安禮樞密副使宗尹言女直人除明安穆昆僕從差使餘無差役今不推奴婢孳畜地土數目

止驗產業科差為便左丞相守道等言止驗財產多寡分為四等置籍以科差庶得均也左丞通右丞道都點檢襄言括其奴婢之數則貧富自見緩急有事差科與一例差科者不同請俟農隙拘括地土牛具之數各以所見上聞上曰一穆昆戶之貧富穆昆豈不知一明安所領八穆昆一例差科設如一穆昆內有奴婢二三百口者有奴婢一二人者科差與同豈得平均正隆興兵時朕之奴婢萬數孳畜數千而不差一人一馬豈可謂

平朕於廢事未嘗專行與卿謀之往年散置契丹戶安  
禮極言恐擾動朕決行之果得安業安禮雖盡忠未審  
長策其從左丞通等所見拘括推排之十二月上謂宰  
臣曰明安穆昆多新強舊弱差役不均其令推排當日  
中都路始至二十二年八月始詔令集耆老推貧富驗  
土地牛具奴婢之數分為上中下三等以同知大興府  
事完顏烏哩雅先推中都路續遣戶部主事諳達等十  
四人與外官同分路推排九月詔母令富者匿隱畜產



貧戶或有不取養馬者昔海陵時拘括馬畜絕無等級  
富者倖免貧者盡拘入官大為不均今竝覈寔貧富造  
籍有急即按籍取之庶幾無不均之弊張汝弼梁肅奏  
天下民戶通檢既定設有產物移易自應隨業輸納至  
於浮財湏有增耗貧者自貧富者自富似不必屢排推  
也上曰宰執家多有新富者故皆不願也肅對曰如臣  
者能推排中都物力臣以嘗為南使先自添物力錢至  
六十餘貫視其他奉使無如臣多者但小民無知法出

姦生數動搖則易駭如唐宋及遼時或三二十年不測  
通比則有之頻歲推排似為難耳二十六年復以李晏  
等分路推排二十七年奏晏等所定物力之數上曰朕  
以元推天下物力錢三百五萬餘貫除三百貫外令減  
以元推天下物力錢三百五萬餘貫除三百貫外令減  
五萬餘貫今減不及數復續收二萬餘貫即是實三萬  
貫爾而曰續收何也對曰此謂舊脫漏而今首出者及  
民地舊無力耕種而今耕種者也上曰通檢舊數止於

視其營運息耗與房地多寡而加減之彼人賣地此人買之皆舊數也至如營運此強則彼弱强者增之弱者減之而已且物力之數益是定差役之法其大數不在多寡也朕恐寔有營運富家所當出者應分與貧者爾章宗大定二十九年六月命為國信使之副者免增物力命又農民如有積粟毋充物力錢慳之郡所納錢貨則許折粟帛九月以曹州河溢遣馬百祿等推排遭墊溺州縣之貧乏者明昌元年四月刑部郎中路伯達等

言民地已納稅又通定物力比之浮財所出差役是為重併也遂詳酌民地定物力減十之二尚書戶部言中都等路被水詔委官推排比舊減錢五千六百餘貫三年八月勅尚書省臣曰百姓當豐稔之時不務積貯一遇凶儉輒有阻飢何法可使民重穀而多積也宰臣對曰二十九年已詔農民能積粟免充物力明昌初命民之物力與地土通推者亦減十分之二此固其術也承安元年尚書省奏是年九月當推排以有故不克詔以冬已深比事畢恐妨農作乃權止之二年冬十

月勅令議通檢宰臣奏曰大定二十七年通檢後距今已十年舊戶貧弱者衆僮遲更定恐致流亡遂定制已典賣物業止隨物推收析戶異居者許令別籍戶絕及困弱者減免新强者詳審增之止當從寔不必敷足元數邊城被寇之地皆不必推排於是令吏部尚書賈執剛吏部侍郎高汝礪先推排在都兩警巡院示為諸路法每路差官一員命提刑司官一員副之三年九月奏十三路籍定推排物力錢二百五十八萬六千七百二貫四百

九十文舊額三百二萬二千七百十八貫九百二十二文以貧乏除免六十三萬八千一百一十一貫除上京北京西京路無新強增者餘路計收二十萬二千九五貫泰和二年閏十二月上以推排時既問人戶浮財物力而又勘當比次期迫事繁難得其寔勅尚書省定人戶物力隨時推收法詔令自今凡典賣事產者隨業推收別置標簿臨時止拘浮財物力以增減之四年十二月上以職官仕於遠方其家物力有應除而不除者

遂成典賣寔業逐時推收若無浮財營運應除免者令  
本家陳告集坊村人戶推唱驗寔免之造籍後如無人  
告一月內以本官文牒推唱定標附於籍五年以西京  
北京邊地常罹兵荒遣使推排之舊大定二十六年所  
定三十五萬三千餘貫遂減為二十八萬七千餘貫六  
月簽南京按察司事李革上言近奉制令人戶推收物  
力置簿標題至通推時止增新強銷舊弱庶得其實今  
有司奉行減裂恐臨時冗併辛難詳審可定期限立罪

以督之遂令自今年十一月一日令人戶告詣推收標  
附至次年二月一日畢違期不言者坐罪且令諸處稅  
務具稅訖房地每半月具數申報所屬違者坐以怠慢  
輕重之罪仍勅物力既隨業通推時令止定浮財八年  
九月以吏部尚書賈守謙知濟南府事富察章嘉努莒  
州刺史完顏伯嘉南京路轉運使宋元吉等十三員分  
路同本路按察司一員推排諸路上乃召至香閣親諭  
之曰朕選卿等隨路推排除推收外其新強銷之戶雖



集衆推唱然消乏者勿銷不盡如一戶物力元三百貫  
令蠲免二百五十貫猶有未當者新強勿添盡量存其  
力如一戶可添三百貫而止添二百貫之類卿等各宜  
盡心一推之後十年利害所關苟不副所任罪當不輕  
也

欽定四庫全書

金史卷四十七

元中書右丞相總裁托克托等修

志第二十八

食貨二

田賦 租賦  
牛具稅

田制量田以營造尺五尺為步闊一步長二百四十步為畝百畝為頃民田業各從其便賣質於人無禁但令隨地輸租而已凡桑棗民戶以多植為勤少者必植其

地十之三明安穆昆戶少者必課種其地十之一除枯  
補新使之不闕凡官地明安穆昆及貧民請射者寬鄉  
一丁百畝狹鄉十畝中男半之請射荒地者以最下第  
五等減半定租八年始徵之作已業者以第七等減半  
為稅七年始徵之自首冒比鄰地者輸官租三分之二  
佃黃河退灘者次年納租太宗天會九年五月始分遣  
諸路勸農之使者熙宗天眷十四年罷拉林混同間護  
邏地以予民耕牧海陵正隆元年二月遣刑部尚書赫

舍哩羅索等十一人分行大興府山東真定府拘括係  
官或荒閑牧地及官民占射逃絕戶地戍兵占佃官籍  
監外路官本業外增置土田及大興府平州路僧尼道  
士女冠等地益以授所遷之明安穆昆戶且令民請射  
而官得其租也世宗大定五年十二月上以京畿兩明  
安民戶不自耕墾及伐桑棗為薪鬻之命大興少尹完  
顏讓巡察十年四月禁侵耕園場地十一年謂侍臣曰  
往歲清暑山西路傍皆禾稼殆無牧地嘗下令使民五

里外乃得耕墾今聞其民以此去之他所甚可矜憫其  
令依舊耕種毋致失業凡害民之事患在不知知之朕  
必不為自今事有類此卿等即告無隱十三年勅有司  
每歲遣官勸明安穆昆農事恐有煩擾自今止令各管  
職官勸督弛慢者舉劾以聞十七年六月邢州男子趙  
迪簡言隨路不附籍官田及河灘地皆為豪強所占而  
貧民土瘠稅重乞遣官拘籍冒佃者定立租課復量減  
人戶稅數庶得輕重均平詔付有司將行而止復以近

都明安穆昆所給官地率皆薄瘠豪民租佃官田歲久  
往往冒為己業令拘籍之又謂省臣曰官地非民誰種  
然女直人戶自鄉土三四千里移來盡得薄地若不拘  
刷良田給之久必貧乏其遣官察之又謂叅知政事張  
汝弼曰先嘗遣問女直土地皆云良田及朕出獵因問  
之則謂自起移至此不能種蒔斫蘆為席或斬芻以自  
給卿等其議之省臣奏官地所以人多蔽匿盜耕者由  
其罪輕故也乃更條約立限令人自陳過限則人能告

者有賞遣同知中都路轉運使張九思往拘籍之十九年二月上如春水見民桑多為牧畜嚙毀詔親王公主及勢要家牧畜有犯民桑者許所屬縣官立加懲斷十一月謂宰臣曰亡遼時所撥地與本朝元帥府已曾拘籍矣民或指射為無主地租地及新開荒為已業者可以拘括其間播種歲久若遽奪之恐民失業因詔括地官張九思戒之復謂宰臣曰朕聞括地事所行極不當如皇后莊太子務之類止以名稱便為官地百姓所執

憑驗一切不問其相鄰冒占官地復有幸免者能使軍  
戶稍給民不失業乃朕之心也二十年四月以行幸道  
隘扈從人不便詔戶部沿路頓舍側近官地勿租與民  
耕種又詔故太保阿里先於山東路撥地百四十頃大  
定初又於中都路賜田百頃命拘山東之地入官五月  
諭有司曰白石門至野狐嶺其間淀澤多為民耕植者  
而官民雜畜往來無牧放之所可差官括元荒地及冒  
佃之數二十一年正月上謂宰臣曰山東大名等路明



安穆昆戶之民往往驕縱不親稼穡不令家人農作盡令漢人佃時取租而已富家盡服紕綺酒食遊宴貧者爭慕效之欲望家給人足難矣近已禁賣奴婢約其吉凶之禮更當委官閱實戶數計口授地必令自耕力不贍者方許佃於人仍禁其農時飲酒又曰奚人六明安已徙居咸平臨潢泰州其地肥沃且精勤農務各安其居女直人徙居奚地者菽粟得收穫否左丞守道對曰聞皆自耕歲用亦足上曰彼地肥美異於他處惟附都

民以水害稼者振之三月陳言者言豪強之家多占奪  
田者上曰前叅政納哈搭椿年占地八百頃又聞山西  
田亦多為權要所占有一家一口至三十頃者致小民  
無田可耕徙居陰山之惡地何以自存其令占官地十  
頃以上者皆括籍入官將均賜貧民省臣又奏椿年明  
安薩哈故太師諾延溫都思忠孫長壽等親屬計七十  
餘家所占地三千餘頃上曰至秋除牛頭地外仍各給  
十頃餘皆拘入官山後招討司所括者亦當同此也又

謂宰臣曰山東路所括民間已分給女直屯田人戶復有籍官閑地依元數還民仍免租稅六月上謂省臣曰近者大興府平灤薊通順等州經水災之地免今年租稅不罹水災者姑停夏稅俟稔歲徵之時中都大水而濱隸等州及山後大熟命修治懷來以南道路以來糴者又命都城減價以糴又曰近遣使閱視秋稼聞明安穆昆人惟酒是務往往以田租人而預借三二年租課者或種而不耘聽其荒蕪者自今皆令閱實各戶人力

可耨幾頃畝必使自耕耘之其力果不及者方許租賃如惰農飲酒勸農穆昆及本管明安穆昆并都管各以等第科罪收穫數多者則亦以等第遷賞七月上謂宰臣曰前徙宗室戶於河間撥地處之而不迴納舊地豈有兩地皆占之理自今當以一處賜之山東刷民田已分給女直屯田戶復有餘地當以還民而免是歲之租八月尚書省奏山東所刷地數上謂梁肅曰朕嘗以此問卿卿不以言此雖稱民地然皆無明據括為官地有

何不可又曰黃河已移故道梁山灤水退地甚廣已嘗遣使安置屯田民昔嘗恣意種之今官已籍其地而民懼徵其租逃者甚衆若徵其租而以冒佃不即出首罪論之固宜然若遽取之恐致失所可免其徵赦其罪別以官地給之御史臺奏大名濟州因刷梁山灤官地或有以民地被刷者上復召宰臣曰雖曾經通檢納稅而無明驗者復當刷問有公據者雖付本人仍須體問十月復與張仲愈論冒占田事二十二年以附都明安戶

不自種悉租與民有一家百口壠無一苗者上曰勸農官何勸諭為也其令治罪宰臣奏曰不自種而輒與人者合科違例上曰太重愚民安知遂從大興少尹王翬所奏以不種者杖六十穆昆四十受租百姓無罪又命招復梁山灤流民官給以田時人戶有執契據指墳壠為驗者亦拘在官先委恩州刺史奚晦招之復遣安肅州刺史張國基驗實給之如已撥係猛安則償以官田上曰工部尚書張九思執強不通向遣刷官田凡犯秦

漢以來名稱如長城燕子城之類者皆以為官田此田  
百姓為己業不知幾百年矣所見如此何不通之甚也  
八月以趙王永中等四王府冒占官田罪其各府長吏  
府掾及安次新城宛平昌平永清懷柔六縣官皆罰贖  
有差九月遣刑部尚書伊喇慥於山東路明安內摘入  
穆昆徙民於河北東路綽哈成格勒兩明安舊居之地  
無牛者官給之河間宗室未徙者令盡徙于平州無力  
者官津發之土薄者易以良田先嘗令俟豐年則括籍

官地至是歲省臣復以為奏上曰本為新徙四明安貧窮須刷官田與之若張仲愈等所擬條約太刻但以民初無得地之由自撫定後未嘗輸稅妄通為已業者刷之如此恐民苦之可為酬直且先令明安穆昆人戶隨宜分處計其丁壯牛具合得土田實數給之不足則以前所刷地二萬餘頃補之復不足則續當別議者有要者與布色等爭懿州地六萬頃以皆無據驗遂沒入官二十七年隨處官豪之家多侵占官地轉與它人種佃



規取課利命有司拘刷見數以與貧難無地者每丁授五十畝庶不致失所餘佃不盡者方許豪家驗丁租佃章宗大定二十九年五月擬再立限令貧民請佃官地緣今已過期計已數足其占而有餘者若容告許恐滋姦弊况續告漏通地勅旨已革今限外告者宜却之止付元佃兼平陽一路地狹人稠官地當盡數拘籍驗丁以給貧民上曰限外指告多佃官地者却之當矣如無主不願承佃方許諸人告請其平陽路宜計丁限田如

一家三丁已業止三十畝則更許存所佃官佃一項二十畝餘者拘籍給付貧民可也七月諭旨尚書省曰唐鄧穎蔡宿泗等處水陸膏腴之地若驗等級量立歲租寬其徵納之限募民佃之公私有益今河南沿邊地多為豪民冒占若民或流移至彼就募令耕不惟貧民有贍亦增羨官租其給丁壯者田及耕具而免其租稅八月尚書省奏河東地狹稍凶荒則流亡相繼竊謂河南地廣人稀若令招集他路流民量給閑田則河東飢民

減少河南且無曠地矣上從所請九月戊寅又奏在制  
諸人請佃官閑地者免五年租課今乞免八年則或多  
懇竝從之十一月尚書省奏民驗丁佃河南荒閑官地  
者如願作官地則免稅八年則願為已業則免稅三年  
不許貿易典賣若豪強及公吏輩有冒佃者限兩月陳  
首免罪而全給之其稅則視其鄰地定之以三分為率  
減一分限外許諸人告詣給之制可明昌元年二月諭  
旨有司曰瀕水民地已種蒔而為水浸者可令以所近

官田對給三月勅當軍人所授田止令自種力不足者  
方許人承佃亦止隨地所產納租其自欲折租輸納者  
從民所欲不願承佃者毋強六月尚書省奏近制以明  
安穆昆戶不務栽植桑果已令每十畝須栽一畝今乞  
再下各路提刑及所屬州縣勸諭民戶如有不栽及栽  
之不及十之三者竝以事怠慢輕重罪科之詔可八月  
勅隨處係官閒地百姓已請佃者仍舊未佃者以付屯  
田明安穆昆三年六月尚書省奏南京陝西路提刑司

言舊牧馬地久不分撥以致軍民起訟比差官往各路  
定之凡民戶有憑驗已業及宅井墳園已改正給付而  
其中復有官地者亦驗數對易之矣兩路牧地南京路  
六萬三千五百二十餘頃陝西路三萬五千六百八十  
餘頃五年諭旨尚書省遼東等路女直漢兒百姓所立  
令量力為蠶桑二月陳言人乞以長吏勸農立殿最遂  
定制能勸農田者每年穆昆賞銀絹一兩匹明安倍之  
縣官於本等陞五年三年不怠者明安穆昆遷一官縣

官陞一等田荒及十之一者筭三十分數加至徒一年  
三年皆荒者明安穆昆追一官縣官以陞等法降之為  
永格六年二月詔罷括陝西之地又陝西提刑司言本  
路戶民安水磨油枘所占步數在私地有稅官田則有  
租若更輸水利錢銀是重併也乞除之省臣奏水利錢  
銀以輔本路之用未可除也宜實視占地數除稅租命  
他路視此為法承安二年遣戶部郎中上官瑜往西京  
并沿邊勸舉軍民耕種又差戶部郎中李敬義往臨潢

等路規畫農事舊令軍人所授之地不得租賃與人違  
諸苗付地主泰和四年九月定制所撥地止十里內自  
種之數每丁四十畝續進丁同此餘者許令便宜租賃  
及兩和分種違者錢業還主上聞六路括地時其間屯  
田軍戶多冒名增口以請官地及包取民間而民有空  
輸賦稅虛抱物力者應詔陳言人多論之五年二月尚  
書省奏若復遣官分往追照案憑訟言紛紛何時已乎  
遂令虛抱稅石已輸送入官者命於稅內每歲續剋之

泰和七年募民種佃清河等處地以其租分為諸春水處餌鷄鴨之食八年八月戶部尚書高汝礪言舊制人戶請佃荒地者以各路最下第五等減半定租仍免八年輸納若作已業竝依第七等稅錢減半亦免三年輸納自首冒佃比鄰田定租三分納二其請佃黃河退灘地者次年納租向者小民不為久計比至納租之時多巧避匿或復告退蓋由元限太速請佃之初無人保識故爾今請佃者可免三年作已業者免一年自首冒佃



并請退灘地竝令當年輸租以鄰首保識為長制宣宗  
貞祐元年七月以既徙河北軍戶於河南議所以處之  
者宰臣曰當指官田及牧地分界之民已佃者則俟秋  
穫後仍日給米一升折以分鈔太常丞舒穆魯世勛曰  
荒田牧地耕闢費力奪民素懇則民失所況軍戶率無  
牛宜令軍戶分人歸守本業至春復還為固守計上卒  
從宰臣議將括之侍御史劉元規上書曰伏見朝廷有  
括地之議聞者無不駭愕向者河北山東已為此舉民

之塋墓井竈悉為軍有怨嗟爭訟至今未絕若復行之  
則將大失衆心荒田不可耕徒有得地之名而無亨利  
之實縱得熟土不能親耕而復令民佃之所得無幾而  
使紛紛交病哉上大悟罷之八月先以括地事未有定  
論北方侵及河南由是盡起諸路軍戶南來共圖保守  
而不能知所以得軍糧之術衆議謂可分遣官聚耆老  
問之其將益賦或與軍田二者孰便叅政汝礪言河南  
官民地相半又多全佃官地之家一旦奪之何以自括

小民易動難安一時避賦遂有捨田之言及與人能弗悔乎悔則忿心生矣如山東撥地時腹地盡入富家瘠者乃付貧戶無益於軍而民有損惟當倍益官租以給軍食復以係官荒田救地量數與之令其自耕則民不失業官不厲民矣從之三年十月高汝礪言河北軍戶徙居河南者幾萬口人日給粟一升歲費三百六十萬石半以給直猶支三百萬河南租地計二十四萬頃歲租纔一百五十六萬乞於經費之外倍徵以給之遂命

右司諫馮開等五人分諸郡就授以荒官田及牧地可耕者人三十畝十一月又議以括荒田及牧馬地給軍命尚書右丞高汝礪總之汝礪還奏今頃畝之數較之舊籍甚少復瘠惡不可耕均以可耕者與人無幾又僻遠之處必徙居以就之彼皆不能自耕必以與人又當取租於數百里之外況今農田且不能盡闢豈有餘力以農叢薄交固草根糾結之荒地哉軍不可仰此得食也審矣今詢諸軍戶皆曰得半糧猶足自養得田不能

耕復罷其廩將何所賴臣知初籍地之時未嘗按閱其實所以不如其數不得其處也若復考計州縣必各妄承風旨追呼究詰以應命不足其數則妄以指民田充之則所在騷然矣今民之賦役三倍平時飛輓輪轉日不暇給而復為此舉何以堪之且軍戶斃遷行有還期何為以此病民哉病民而軍獲利猶不可為況無所利乎惟陛下加察遂詔罷給田但半給糧半給實直馬四年復遣官括河南牧馬地既籍其數上命省院議所以

給軍者宰臣曰今軍戶當給糧者四十四萬八千餘口計當口占六畝有奇繼來者不與焉但相去數百里者豈能以六畝之故而遠來哉蕪月支口糧不可遽罷臣等竊謂軍戶願佃者卽當計口給之其餘僻遠不願者宜准近制係官荒地許軍民耕闢例令軍民得占蒔之院官曰牧馬地少且久荒難耕軍戶復乏農器然不給之則彼自支糧外更無從得食非蓄銳待敵之計給之則亦未能遽減其糧若得遲以歲月俟頗成倫次漸可

以省官廩耳今奪其有力者即以授其無力者恐無以耕乞令司縣官勸率民戶借牛破荒至來春然後給之司縣官能率民戶以助耕而無騷動者量加官賞庶幾有所激勸宰臣復曰若如所言則司縣官貪慕官賞必將抑配以至擾民今民家之牛量地而畜之況比年以來農功甫畢則併力轉輸猶恐不及豈有暇耕它人之田也惟如臣等前奏為便詔再議之乃擬民有能開牧馬地及官荒地作熟田者以半給之為永業半給軍戶

奏可四年省奏自古用兵且耕且戰是以兵食交足今  
諸帥分兵不啻百萬一充軍伍咸仰於官至於婦子居  
家安坐待哺蓋不知屯田為經久之計也願下明詔令  
諸帥府各以其軍耕耨亦以逸待勞之策也詔從之興  
定三年正月尚書右丞領三司事侯摯言按河南軍民  
田總一百九十七萬頃有奇見耕種者九十六萬餘頃  
上田可收一石二斗中田壹石下田八斗十一取之歲  
得九百六十萬石自可優給歲支且使貧富均大小各



得其所臣在東平嘗試行二三年民不疲而軍用足詔  
有司議行之四年十月伊里布言軍戶自徙於河南數  
歲尚未給田兼以移徙不常莫得安居故貧者甚衆請  
括諸屯處官田人給三十畝仍不移心它所如此則軍  
戶可以得所官糧可以漸省宰臣奏前此亦有言授地  
者樞密院以謂俟事緩而行之今河南罹水災流亡者  
衆所種麥不及五萬頃殆減往年大半歲所入殆不能  
足若撥之授為永業俟有獲即罷其家糧亦省費之一

端也上從之又河南水災逋戶大半田野荒蕪恐賦入少而國用乏遂命唐鄧裕蔡息壽穎毫及歸德府被水田已燥者布種未滲者種稻復業之戶免本租及一切差發能代耕者如之有司擅科者以違制論闕牛及食者率富者就貸五年正月京南行三司舒穆魯幹魯言京南東西三路屯軍老幼四十萬口歲費糧百四十餘萬石皆坐食民租非善計宜括逋戶舊耕田南京一路舊墾田三十九萬八千五百餘頃內官田民耕者九萬

九千頃有奇今飢民流離者大半東西南路計亦如之朝廷雖招使復業民恐既復之後生計未定而賦歛隨之往往匿而不出若分給軍戶人三十畝使之自耕或召人佃種可數歲之後畜積漸饒官糧可罷令省臣議之更不能行

租賦金制官地輸租私田輸稅租之制不傳大率分田之等為九而差次之夏稅畝取三合秋稅畝取五升又納秸一束束十有五斤夏稅六月止八月秋稅十月止

十二月為初中末三限州三百里外紓其期一月屯田  
戶佃官地者有司移明安穆昆督之泰和五年章宗諭  
宰臣曰十月民獲未畢遽令納稅可乎改秋稅限十一  
月為初中都西京北京上京遼東臨潢陝西地寒稼穡  
遲熟夏稅限以七月為初凡輸送粟麥三百里外石減  
五升以上每三百里遞減五升粟折秸百稱者百里內  
減三稱二百里減五稱不及三百里減八稱三百里及  
輸本色粟草各減十稱計民田園邸舍車乘牧畜種植

之資藏鏹之數徵錢有差謂之物力錢遇差科必按版籍先及富者勢均則以丁多寡定甲乙有橫科則視物力循大至小均科其或不可分摘者率以次戶濟之凡民之物力所居之宅不預明安穆昆戶監戶官戶所居外自置民田宅則預其數墓田學田租稅物力皆免民懇水旱應免者河南山東河東大名京兆鳳翔彰德部內支郡夏田四月秋田七月餘路夏以五月秋以八月水田則通以八月為限遇閏月則展期半月限外懇者

不理非時之災則無限損十之八者全免七分免所損之數六分則全徵桑被災不能蠶則免絲綿絹稅諸路雨雪及禾稼收穫之數月以捷步申戶部凡叙使品官之家並免雜役驗物力所當輸者止出雇錢進納補官未至廕子孫及凡有出身者謂司吏譯人等出職帶官叙當身者雜班叙使五品以下及正品承應已帶散官未出職者子孫與其同居兄弟下逮終場舉人係籍學生醫學生皆免一身之役三代同居已旌門則免差發三年後

免雜役太宗天會元年勅有司輕徭賦勸稼穡十年以  
遼人士庶之族賦役等差不一詔有司命悉均之熙宗  
天眷五年十二月詔免民戶殘欠租稅皇統三年蠲民  
稅之未足者世宗大定二年五月謂宰臣曰凡有徭役  
均科強戶不得抑配貧民有言以用度不足奏預借河  
北東西路中都租稅上以國用雖乏民力尤難遂不允  
三年以歲歉詔免二年租稅又詔曰朕比以元帥府從  
宜行事今聞河南陝西山東北京以東及北邊州郡調

發甚多而省部又與他州一例征取賦役是重擾也可  
憑元帥府已取者例蠲除之五年命有司凡懼蝗旱水  
溢之地蠲其賦稅六年以河北山東水免其租八年十  
月彰德節度使高昌福上書言稅租甚重上乃諭翰林  
學士張景仁曰今租稅比近代甚輕而反以為重何也  
景仁曰今之稅斂殊輕非稅斂則國用何從而出二年  
二月尚書省奏天下倉廩貯粟二千七十九萬餘石上  
曰朕聞國無九年之蓄則國非其國朕是以括天下之



田以均其賦歲取九百萬石自經費七百萬石外二百萬石又為水旱之所蠲免及振貸之用餘纔百萬石而已朕廣蓄積備饑饉也小民以為稅重小臣沾民譽亦多議之蓋不慮國家緩急之備也十二年正月以水旱免中都西京南京河北河東山東陝西去年租稅十三年謂宰臣曰民間科差計所免已過半矣慮小民不能詳知吏緣為姦仍舊徵取其令所在揭榜諭之十月勅州縣官不盡力催督稅租以致逋懸者可止其俸使之

徵足然後給之十六年正月詔免去年被水旱路分租  
稅十七年上問宰臣曰遼東賦稅舊六萬餘石通檢後  
幾二十萬六萬時何以仰給二十萬後所積幾何戶部  
契勘謂先以官吏數少故能給今官吏兵卒及孤老數  
多以此費大上曰當察其實毋令妄費也十七年三月  
詔免河北山東陝西河東西京遼東等十路去年被旱  
蝗租稅十八年正月免中都河北河東山東河南陝西  
等路前年被災租稅十九年秋中都西京河北山東河

東陝西以水旱傷民田十三萬七千七百餘頃詔蠲其  
租二十年三月以中都西京河北山東河東陝西等路  
前歲被災詔免租稅以戶部尚書曹望之之言詔減廊  
延及河東南路稅五十二萬餘石增河北西路稅八萬  
八千石又詔誘稅粟非闕邊要之地者除當儲數外聽  
民從便折納二十一年九月以中都水災免租前時近  
官路百姓以牛夫充遞運者復以宅處未嘗就沒之家  
徵錢償之二十三年宗州民王仲規告乞徵還所役牛

夫錢省臣以奏上曰此既就役復徵錢於彼前雖如此行之復恐所給錢未必能到本戶是兩不便也不若止許所役免租稅及鋪馬錢為便其預計實數以聞若和雇價值亦須裁定也有司上其數歲約給六萬四千餘貫計折粟八萬六千餘石上復命自今役牛夫之家以去道三十里內居者充役二十六年軍民地罹水旱之災者二十一萬頃免稅凡四十九萬餘石二十七年六月免中都河北等路嘗被河決水災軍民租稅十一月

詔河水泛溢農田被災者與免差稅一年懷衛孟鄭四  
州塞河勞役并免今年差稅章宗大定二十九年赦民  
租十之一河東南北路則量減之尚書省奏兩路田多  
峻阪磽瘠者往往再歲一易若不以地等級蠲除則有  
不均遂勅以赦書特免一分外中田復減一分下田減  
二分舊制夏秋稅納麥粟草三色以各處所需之物不  
一戶部復令以諸所用物折納上封事者言其不可戶  
部謂如此則諸路所湏之物要當和市轉擾民矣遂命

太府監應折納之物為祇承宮禁者治黃河薪芻增直  
二錢折納如黃河岸所用木石固非土產乃令所屬計  
置而罷它應折納者四月上封事者乞薄民之租稅恐  
廩粟積久腐敗省臣奏曰臣等議大定十八年戶部尚  
書曹望之奏河東及鄜延兩路稅頗重遂減五十二萬  
餘石去年赦十之一而河東瘠地又減之今以歲入度  
支所餘無幾萬一有水旱之災既蠲免其所入復出粟  
以振之非有備不可若復欲減將何以待之如慮腐敗

令諸路以時曝晾毋令致壞違者問如律制可十一月  
尚書省奏河南荒閑官地許人計丁請佃願仍為官者  
免租八年願為已業者免稅三年詔從之昌明二年二  
月勅自今民有訴水旱災傷者即委官按視其實申所  
屬州府移報提刑司同所屬檢舉始令翻耕三年六月  
有司言河州水傷關食之民猶有未輸租者詔蠲之九  
月以山東河北三路被災其權閭之租及借貸之粟令  
俟歲豐日熟徵上如秋山免圍場經過人戶今歲夏秋

租稅之半四年冬十月上行幸諭旨尚書省曰海墾石  
城等縣地瘠民困所種惟黍稷而已及賦於官必以易  
粟輸之或令止課所產或依河東路減歲至還京當定  
議以聞五年勅免河決被災之民秋租泰和四年四月  
以久旱下詔責躬免所旱州縣今年夏稅九月陳言者  
謂河間滄州逃戶物力錢至數千貫而其差發有司止  
取辦於見戶民不能堪矣詔令按察司除地土物力命  
隨其業而權止其浮財物力五年正月詔有司自泰和



三年嘗所行幸至三次者被科之民特免半年祖稅八年五月以宋請和詔天下免河南山東陝西六路今年夏稅河東河北大名等五路半之八月詔諸路農民請佃荒田者與免租賦三年作已業者一年自首冒佃及請佃黃河退灘地者不在免例宣宗貞祐三年十月御史田廸秀言方今軍國所需一切責之河南有司不惜民力微調太急促其期限痛其樵楚民已罄其所有而不足遂使奔走旁求於它境力竭財殫相踵散亡禁之

不能止也。乞自今凡科徵必先期告之，不急者皆罷廢。民力寬而逋者可復詔行之。十二月詔免逃戶租稅四年。三月免陝西逃戶租。五月山東行省布薩安貞言泗州被災道瑾相望，所食者草根木皮而已。而邳州戍兵數萬，急徵重役，悉出三縣。官吏酷暴，擅括宿藏以應一切之命。民皆逋竄，又別遣進納閑官以相迫督，皆怙勢營私，實到官者纔十之一，而徒使國家有厚歛之名。乞命信臣革此弊以安百姓。詔從之。興定元年二月免南

京嵩汝等逋租十六萬石四年御史中丞完顏伯嘉奏  
亳州大水計當免租三十萬石而三司官不以實報止  
免十萬而已詔命治三司官虛妄之罪七月以河南大  
水下詔免租勸種且命叅知府事李復亨為宣慰使中  
丞完顏伯嘉副之十月以久雨令寬民輸稅之限十一  
月上曰聞百姓多逃而逋賦皆抑配見戶人何以堪軍  
儲既足宜悉除免今又添軍須錢太多亡者豈肯復業  
乎遂命行部官閱實免之已代納者給以恩例或除它

役仍減桑皮故紙錢四之一三年令逃戶復業者但輸  
本租餘苦役一免皆免能代耕者免如復戶有司失信  
擅科者以違制論四年十二月鎮南軍節度使溫特赫  
思敬上書言今民輸稅其法大抵有三上戶輸遠倉中  
戶次之下戶最近然近者不下百里遠者數百里道路  
之費倍於所輸而雨雪有稽違之責遇賊有死傷之患  
不若止輸本郡令有司檢算倉之所積稱屯兵之數使  
就食之若有不足則增歛於民民計所歛不及道里之

費將忻然從之矣五年十月上諭宰臣曰比欲民種多  
麥故令所在官貸易麥種今聞實不貸與而虛立案簿  
反收其數以補不足之租其遣使究治元光元年上聞  
向者有司以徵租稅之急民不待熟而刈之以應限今  
麥將熟矣其諭州縣有犯者以慢軍儲治罪九月權立  
職官有田不納租罪京南司農卿李蹊言按齊民要術  
麥晚種則粒而不實故必八月種之今南路計當輸秋  
稅百四十餘萬石草四百五十餘萬束皆以八月為終

限若輸遠倉及泥淖往返不下二十日使民不暇趨時是妨來歲之食也乞寬征斂之限使先盡力于二麥朝廷不從元光二年宰相奏去歲正月京師見糧纔六十餘萬石今三倍矣計國用頗足而民間租稅徵之不絕恐貧民無所輸而逋亡也遂以中旨遍諭止之

牛頭稅即牛具稅明安穆昆部女直戶所輸之稅也其制每來牛三頭為一具限民口二十五受田四頃四畝有奇歲輸粟大約不過一石官民占田無過四十具天

會三年太宗以歲稔官無儲積無以備饑饉詔令一畧  
賦粟一石每穆昆別為一廩貯之四年詔內地諸路每  
牛一具賦粟五斗為定制世宗大定元年詔諸明安不  
經遷移者徵牛具歲粟就令穆昆監其倉虧損則坐之  
十二年尚書省奏唐古部民舊同明安穆昆定稅其後  
改明川縣履畝立稅頗以為重遂命從舊制二十年定  
功授世襲穆昆許以親族從行當給以地者除牛九具  
以下全給十具以上四十具以下者則于官豪之家量


撥地六具與之二十一年世宗謂宰臣曰前時一歲所  
收可支三年比聞今歲山西豐稔所獲可支三年此間  
地一歲所獲不能支半歲而又牛頭稅粟每牛一頭止  
令各輸三斗又多逋懸此皆逋互隱匿所致當令盡實  
輸之二十三年有司奏其事世宗謂左丞完顏襄曰卿  
家舊止七具今定為四十具朕始令卿等議此而卿皆  
不欲蓋各顧其私爾是後限民口二十五算牛一具七  
月尚書省復奏其事上慮版籍歲久貧富不同明安穆



昆又皆年少不練時事一旦軍興按籍徵之必有不均之患乃令驗實推排閱其戶口畜產之數其以上京二十二路來上八月尚書省奏推排定明安穆昆戶口田畝牛具之數明安二百二穆昆千八百七十八戶六十一萬五千六百二十四口六百一十五萬八千六百三十六內正口四百八十一萬二千六百六十九奴婢口一百三十四萬五千九百六十七田一百六十九萬三百八十頃有奇牛具三十八萬四千七百七十一在都

宗室將軍司戶一百七十口二萬八千七百九十內正  
口九百八十二奴婢口二萬七千八百八田三千六百  
八十三頃七十五畝有奇牛具三百四德呼勒唐古二  
部五紉戶五千五百八十五口十三萬七千五百四十  
四內正口十一萬九千四百六十二奴婢口一萬八千  
八十一田四萬六千二十四頃一十七畝牛具五千六  
十六後二十六年尚書省奏併徵牛頭稅粟上曰積壓  
五年一旦併徵民何以堪其令民隨年輸納被災者蠲

之貸者俟豐年徵還



金史卷四十七

# 欽定四庫全書

史部  
金史卷  
四十八至  
五十

詳校官國子監祭酒臣覺羅吉善

內閣中書臣李彤覆勘

總校官舉人臣章維桓

校對官學錄臣常楸

謄錄監生臣張彭齡

入定四庫全書

金史卷四十八

元中書右丞相總裁托克托等修

志第二十九

食貨三錢幣

錢幣金初用遼宋舊錢天會宋雖劉豫阜昌元寶阜昌重寶亦用之海陵庶人貞元二年遷都之後戶部尚書蔡松年復鈔引法遂製交鈔與錢並用正隆二年歷四

十餘歲始議鼓鑄冬十月初禁銅越外界懸罪賞格括  
民間銅鑄器陝西南京者輸京兆他路悉輸中都三年  
二月中都置錢監二東曰寶源西曰寶豐京兆置監一  
曰利用三監鑄錢文曰正隆通寶輕重如宋小平錢而  
肉好字文峻整過之與舊錢通用世宗大定元年用吏  
部尚書張中彥言命陝西路參用宋舊鐵錢四年寔不  
行詔陝西行戶部并兩路通檢官詳究其事皆言民間  
用錢名與鐵錢兼用其實不為準數公私不便遂罷之

八年民有犯銅禁者上曰銷錢作銅舊有禁令然民間猶有鑄錢者非銷錢而何遂併禁之十年上諭戶部臣曰官錢積而不散則民間錢重貿易必艱宜令市金銀及諸物其諸路酤權之貨亦令以物平折輸之十月上責戶部官曰先以官錢率多恐民間不得流通令諸處貿易金銀絲帛以圖流轉今知乃有以抑配反害百姓者前許院務得折納輕賁之物以便民是皆朕思而後行者也此尚出朕安用若為又隨處時有振濟往往近

地無糧取于它處往反既遠人愈難之何為不隨處起倉年豐則多糴以備振贍設有緩急亦豈不易辦乎而徒使錢充府庫將安用之天下之大朕豈能一一徧知凡此數事汝等何為而使至此且戶部與它部不同當從宜為計若但務因循以守其職則戶部官誰不能為十一年二月禁私鑄銅鏡舊有銅器悉送官給其直之半惟神佛像鐘磬鈸鈞腰束帶魚袋之屬則存之十二年正月以錢少命尚書省遣使諸路規措銅貨能指坑



治得實者賞上與宰臣議鼓鑄之術宰臣曰有言所在  
有金銀坑冶皆可採以鑄錢臣竊謂工費過于所得數  
倍恐不可行上曰金銀山澤之利當以與民唯錢不當  
私鑄今國家財用豐盈若流布四方與在官何異所費  
雖多俱在民間而新錢日增爾其遣能吏經營之左丞  
石琚進曰臣聞天子之富藏在天下錢貨如泉正欲流  
通上復問琚曰古亦有民自鑄錢者乎琚對曰民若自  
鑄則小人圖利錢益薄惡此古所以禁也十三年命非

屯兵之州府以錢市易金帛運致京師使錢幣流通以濟民用十五年十一月上謂宰臣曰或言鑄錢無益所得不償所費朕謂不然天下一家何公私之間公家之費私家得之但新幣日增公私俱便也十六年三月遣使分路訪察銅鑛苗脈十八年代州立監鑄錢命震武軍節度使李天吉知保德軍事高季孫往監之而所鑄斑駁黑澁不可用詔削天吉季孫等官兩階解職仍杖季孫八十更命工部郎中張大節吏部員外郎麻珪監

鑄其錢文曰大定通寶字文肉好又勝正隆之制世傳其錢料微用銀云十九年始鑄至萬六千餘貫二十年詔先以五千進呈而後命與舊錢並用初新錢之未行也以宋大觀錢作當五用之二月上聞上京修內所市民物不即與直又用短錢責宰臣曰如此小事朕豈能悉知卿等何為不察也時民間以八十為陌謂之短錢官用足陌謂之長錢大名男子鄂勒巴者上言謂官私所用錢皆當以八十為陌遂為定制二十年十一月名

代州監曰阜通設監一員正五品以州節度兼領副監  
一員正六品以州同知兼領丞一員正七品以觀察判  
官兼領設勾當官二員從八品給銀牌命副監及丞更  
馳驛經理二十二年十月以參知政事鈕祜祿額特埒  
提控代州阜通監二十三年上以阜通鼓鑄歲久而錢  
不加多蓋以代州長貳廳幕兼領而奪于州務不得專  
意綜理故也遂設副監監丞為正員而以節度領監事  
二十六年上曰中外皆言錢難朕嘗計之京師積錢五

百萬貫亦不為多外路雖有終亦無用諸路官錢非屯  
兵處可盡運至京師太尉丞相克寧曰民間錢固已艱  
得若盡歸京師民益艱得矣不若起其半至都餘半變  
折輕齎則中外皆便十一月上諭宰臣曰國家銅禁久  
矣尚聞民私造腰帶及鏡託為舊物公然市之宜加禁  
約二十七年二月曲陽縣鑄錢別為一監以利通為名  
設副監監丞給驛更出經營銅事二十八年上謂宰臣  
曰今者外路見錢其數甚多聞有六千餘萬貫皆在僻

處積貯既不流散公私無益與無等耳今中都歲費三百萬貫支用不繼若致之京師不過少有輓運之費縱所費多亦惟散在民爾章宗大定二十九年十二月雁門五臺民劉完等訴自立監鑄錢以來有銅鑛之地雖曰官運其顧直不足則令民共償乞與本州司縣均為差配遂命甄官署丞丁用楫往審其利病還言所運銅鑛民以物力科差濟之非所願也其顧直既低又有剗剗之弊而相視苗脈工匠妄指人之垣屋及寺觀謂當

開採因以取賄又隨冶夫匠日辦淨銅四兩多不及數  
復銷銅器及舊錢送官以足之今阜通利用兩監歲鑄  
錢十四萬餘貫而歲所費乃至八十餘萬貫病民而多  
費未見其利便也宰臣以聞乃罷代州曲陽二監初貞  
元間既行鈔引法遂設印造鈔引庫及交鈔庫皆設使  
副判各一員都監一員而交鈔庫副則專主書押搭印  
合同之事印一貫二貫三貫五貫十貫五等謂之大鈔  
一百二百三百五百七百五等謂之小鈔與鈔並行以

七年為限納舊易新猶循宋張詠四川交子之法而紓其期耳蓋亦以銅少權制之法也時有欲罷之者至是二監既罷有司言交鈔舊同見錢商旅利于致遠往往以錢買鈔蓋公私俱便之事豈可罷去止因有釐革年限不能無疑乞削七年釐革之法令民得常用若歲久字文磨滅許于所在官庫納舊換新或聽便支錢遂罷七年釐革之限交鈔字昏方換法自此始而收歛無術出多入少民寢輕之厥後其法屢更而不能革弊亦始



於此馬交鈔之外制為闌作花紋其上衡書貫例左曰  
某字料右曰某字號料號外篆書曰偽造交鈔者斬告  
捕者賞錢三百貫料號衡闌下曰中都交鈔庫准尚書  
戶部符承都堂劄付戶部覆點勘令史姓名押字又曰  
聖旨印造逐路交鈔於某處庫納錢換鈔更許于某處  
庫納鈔換錢官私同見錢流轉其鈔不限年月行用如  
字文故暗或鈔紙擦磨許于所屬庫司納舊換新若到  
庫支錢或倒換新鈔每貫量尅工墨錢若干文庫搗攪

司庫副使各押字年月日印造鈔引庫庫子庫司副使  
各押字上至尚書戶部官亦押字其搭印支錢處合同  
餘用印依常例初大定間定制民間應許存留銅鑰器  
物若申賣入官每斤給錢二百文其棄藏應禁器物首  
納者每斤給錢百文非器物銅貨一百五十文不及斤  
者計給之在都官局及外路造賣銅器價令運司佐貳  
檢校鏡每斤三百十四文鍍金御仙花腰帶十七貫六  
百七十一文五子荔支腰帶十七貫九百七十一文擣

銀羅文束帶八貫五百六十文魚袋二貫三百九文鉞  
鈞鏡磬每斤一貫九百二文鈴杵坐銅者二貫七百六  
十九文銷石者三貫六百四十六文  
明昌二年十月勅  
減賣鏡價防私鑄銷錢也舊嘗以夫匠逾天山北界外  
採銅明昌三年監察御史李炳言頃聞有司奏在官銅  
數可支十年若復每歲令夫匠過界遠採不惟多費復  
恐或生邊釁若支用將盡之日止可于境內採煉上是  
其言遂不許出界五月勅尚書省曰民間流轉交鈔當

限其數毋令多于見錢也四年上諭宰臣曰隨處有無用官物可為計置如鐵錢之類是也或有言鐵錢有破損當令所司以銅價償之者參知政事胥持國不可上曰令償之尚壞不償將盡壞矣若果無用曷別為計持國曰如江南用銅錢江北淮南用鐵錢蓋以隔閡銅錢不令過界爾如陝西市易亦有用銀布薑麻若舊有鐵錢姑宜收貯以備緩急遂令有司籍鐵錢及諸無用之數貯于庫八月提刑司言所降陝西交鈔多于見錢使

民艱于流轉宰臣以聞遂令本路榷稅及諸名色錢折  
交鈔官兵俸許錢絹銀鈔各半之若錢銀數少即全給  
交鈔五年三月宰臣奏民間錢所以艱得以官豪家多  
積故也在唐元和間嘗限富家錢過五千者死王公重  
貶沒入以五之一賞告者上令參酌定制令官民之家  
以品從物力限見錢多不過三萬貫明安穆昆則以牛  
具為差不得過萬貫凡有所餘盡令易諸物收貯之有  
能告數外留錢者奴婢免為良傭者出離以十之一為賞餘

皆沒入又諭旨有司凡出使高麗國還者所得銅器令  
盡買之承安二年十月宰臣奏舊立交鈔法凡以舊易  
新者每貫取工墨錢十五文至大定二十三年不拘貫  
例每張收八文既無益于官亦妨鈔法宜從舊制便若  
以鈔買鹽引每貫權作一貫五十文庶得多售上曰工  
墨錢貫可令收十二文買鹽引者每貫可權作一貫一  
百文時交鈔所出數多民間成貫例者艱于流轉詔以  
西北二京遼東路從宜給小鈔且許于官庫換錢與它

路通行十一月尚書省議謂時所給官兵俸及邊戍軍  
須皆以銀鈔相兼舊例銀每錠五十兩其直百貫民間  
或有截鑿之者其價亦隨低昂遂改鑄銀名承安寶貨  
一兩至十兩分五等每兩折錢二貫公私同見錢用仍  
定銷鑄及接受稽留罪賞格承安三年正月省奏隨處  
權場若許見錢越境雖非銷毀即與銷毀無異遂立制  
以錢與外方人使及與交易者徒五年三斤以上死駟  
僧同罪捕告人之賞官先為代給錢五百貫其逮及與

接引館伴先排通引書表等以次坐罪仍令均償時交鈔稍滯命西京北京臨潢遼東等路一貫以上俱用銀鈔寶貨不許用錢一貫以下聽民便時既行限錢法人多不遵上曰已定條約不為不重其令御史臺及提刑司察之九月以民間鈔滯盡以一貫以下交鈔易錢用之遂復減元限之數更定官民存留錢法三分為率親王公主品官許留一分餘皆半之其贏餘之數期五十日內盡易諸物違者以違制論以錢賞告者於兩行部



各置回易務以綿絹物段易銀鈔亦許本務納銀鈔赴  
權場出鹽引納鈔於山東河北河東等路從便易錢各  
降補官及德號空勅三百度牒一千從兩行部指定處  
限四月進納補換又更造一百例小鈔並許官庫易錢  
一貫二貫例並支小鈔三貫例則支銀一兩小鈔一貫  
若五貫十貫例則四分支小鈔六分支銀欲得寶貨者  
聽有阻滯及輒減價者罪之四年三月又以銀鈔阻滯  
乃權止山東諸路以銀鈔與綿絹鹽引從便易錢之制

令院務諸科名錢除京師河南陝西銀鈔從便餘路並  
許收銀鈔各半仍于鈔四分之一許納其本路隨路所  
收交鈔除本路者不復支發餘通行者並循環用之權  
貨所驚鹽引收納寶貨與鈔相半銀每兩止折鈔兩貫  
省許人依舊諸庫納鈔隨路清河所收除額外羨餘者  
亦如之所支官錢亦以銀鈔相兼銀已零截者令交鈔  
庫不復支若寶貨數少可浸增鑄銀鈔既通則物價自  
平雖有禁法亦安所施遂除阻滯銀鈔罪制四年以戶

部言命在都官錢權貨務鹽引並聽收寶貨附近鹽司貼錢數亦許帶納民間寶貨有所歸自然通行不至銷毀先是設四庫印小鈔以代鈔本令人便費小鈔赴庫換錢即與支見錢無異今更不須印造俟其換盡可罷四庫但以大鈔驗錢數支易見錢時私鑄承安寶貨者多雜以銅錫寢不能行京師開肆五年十二月宰臣奏比以軍儲調發支出交鈔數多遂鑄寶貨與錢兼用以代鈔本蓋權時之制非經久之法遂罷承安寶貨泰和

元年六月通州刺史盧構言民間鈔固已流行獨銀價未平官之所定每錠以十萬為準而市肆纔值八萬益出多入少故也若令諸稅以錢銀鈔三分均納庶革其弊下省議宰臣謂軍興以來全賴交鈔佐用以出多遂滯頃令院務收鈔七分亦漸流通若與銀均納則彼增此減理必偏勝至礙鈔法必欲銀價之平宜令諸名若鋪馬軍須等錢許納銀半無者聽便先是嘗行三合同交鈔至泰和二年止行於民間而官不收歟朝廷慮其

病民遂令諸稅各帶納一分雖止係本路者亦許不限  
路分通納戶部見徵累年鋪馬錢亦聽收其半閏十二  
月上以交鈔事召戶部尚書孫鐸侍郎張復亨議于內  
殿復亨以三合同鈔可行鐸請廢不用既而復亨言竟  
訕自是而後國虛民貧經用不足專以交鈔愚百姓而  
法又不常世宗之業衰焉以至泰和三年其弊彌甚乃  
謂宰臣曰大定間錢至足今民間錢少而又不在于官何  
耶其集問百官必有能知之者四年七月罷限錢法從

戶部尚書上官瑜所請也四年欲增鑄錢命百官議所以足銅之術中丞孟鑄謂銷錢作銅及盜用出境者不止宜罪其官及都太府監梁瑾等言鑄錢甚費率費十錢可得一錢識者謂費雖多猶增一錢也乞採銅拘器以鑄宰臣謂鼓鑄未可速行其銅冶聽民煎煉官為買之凡寺觀不及十人不許畜法器民間銷銅器期以兩月送官給價匿者以私法坐限外人告者以知而不糾坐其官寺觀許童行告者賞俟銅多別具以聞八月定

從便易錢法聽人輸納於京師而于山東河北大名河  
東等路依數支取後鑄大錢一直十篆文曰泰和重寶  
背文有螭虎二與鈔參行五年上欲罷交鈔工墨錢復  
以印費命貫止收六文六年四月陝西交鈔不行以見  
錢十萬貫為鈔本與鈔相易復以小鈔十萬貫參用之  
十一月復許諸路各行小鈔中都路則于中都及保州  
南京路則于南京歸德河南府山東東路則于益都濟  
南府山東西路則于東平大名府河北東路則于河間

府冀州河北西路則於真定彰德府河東南路則于平陽河東北路則于太原汾州遼東則于上京咸平西京則于西京撫州北京則于臨潢府官庫易錢令戶部印小鈔五等附各路同見錢用七年正月勅所在官毋得支出大鈔在民者赴庫以多寡制數易小鈔及見錢院務商稅及諸名錢三分須納大鈔一分惟遼東從便時民以貨幣屢變往往怨嗟聚語于市上知之諭旨于御史臺曰自今都市敢有相聚論鈔法難行者許人捕告



賞錢三百貫五月以戶部尚書高汝礪議立鈔法條約  
添印大小鈔以鈔庫至急切增副使一員汝礪又與中  
都路轉運使孫鐸言錢幣上命中丞孟鑄禮部侍郎秦  
宇國子司業劉昂等十人議月餘不決七月上召議于  
泰和殿且諭汝礪曰今後毋謂鈔多不加重而輒易之  
重之加于錢可也明日勅民間之交易典質一貫以上  
並用交鈔毋得用錢須立契者三分之一用諸物六盤  
山西遼河東以五分之一用鈔東鄙屯田戶以六分之

一用鈔不須立契者惟遼東錢鈔從便犯者徒二年告  
者賞有差監臨犯者杖且解職縣官能奉行流通者升  
餘否者降罰集衆沮法者以違制論工墨錢每張止收  
二錢商旅賣見錢不得過十貫所司籍辦鈔人以防偽  
冒品官及民家存留見錢比舊減其數若舊有見錢多  
者許送官易鈔十貫以上不得出京又定制按察司以  
鈔法流通為稱職而河北按察使錫卜察巡按所給券  
應得鈔一貫以難支用命取見錢御史以沮壞鈔法劾

之上曰糾察之官乃先壞法情不可恕杖之七十削官  
一階解職戶部尚書高汝礪言鈔法務在必行府州縣  
鎮宜各籍辦鈔人給以條印聽與人辨驗隨貫量給二  
錢貫例雖多六錢即止每朝官出使則令體究通滯以  
聞民間舊有宋會子亦令同見錢用十貫以上不許特  
行權鹽許用銀絹餘市易及俸並用交鈔其奇數以小  
鈔足之應支銀絹而不足者亦以鈔給之上遣近侍諭  
旨尚書省今既以按察司鈔法通快為稱職否則為不

稱職仍于州府司縣官給由內明書所犯之處但犯鈔  
法者雖監察御史舉其能幹亦不準用十月楊序言交  
鈔料號不明年月故暗雖令赴庫易新然外路無設定  
庫司欲易無所遠者直須赴都上以問汝礪對曰隨處  
州府庫內各有辦鈔庫子鈔雖弊不偽亦可收納去都  
遠之城邑既有設置合同換錢客旅經之皆可相易更  
慮無合同之地難以易者令官庫凡納昏鈔者受而不  
支于鈔背印記官吏姓名積半歲赴都易新鈔如此則

昏鈔有所歸而無滯矣十一月上諭戶部官曰今鈔法雖行卿等亦宜審察少有壅滯即當以聞勿謂已出而憚改汝礪對曰今諸處置庫多在公廨內小民出入頗難雖有商賈易之然患鈔本不豐比者河北西路轉運司言一富民首其當存留錢外見錢十四萬貫他路脫或有如此者臣等謂宜令州縣委官及庫典于市肆要處置庫支換以出首之鈔為鈔本十萬戶以上州府給三萬貫以次為差易錢者人不得過二貫以所得工墨

錢充庫典食直仍令州府佐貳及轉運司官一員提控  
上是之遂命移庫于市肆之會令民以鈔易錢是月勅  
捕獲偽造交鈔者皆以交鈔為賞時復議更鈔法上從  
高汝礪言命在官大鈔更不許出聽民以五貫十貫例  
者赴庫易小鈔欲得錢者五貫內與一緡十貫內與兩  
緡惟遼東從便河南陝西山東及它行鈔諸路院務諸  
稅及諸科名錢並以三分為率一分納十貫例者二分  
五貫例者餘並收見錢八年正月以京師鈔滯定所司

賞罰格時新制按察司及州縣官例以鈔通滯為升降  
遂命監察御史賞罰同外道按察司大興府警巡院官  
同外路州縣官是月收毀大鈔行小鈔八月從遼東按  
察司楊雲翼言以咸平東京兩路商旅所集遂從都南  
例一貫以罰用交鈔不得用錢十月孫鐸又言民間鈔  
多正宜收歛院務稅諸名錢可盡收鈔秋夏稅納本色  
外亦令收鈔不拘貫例農民知之則漸重鈔可以流通  
比來州縣抑配市肆買鈔徒增騷擾可罷諸處創設鈔

局止令赴省庫換易今小鈔名限路分亦甚未便可令  
通用上命急行之十二月宰臣奏舊制內外官兵俸皆  
給鈔其必用錢以足數者可以十分為率軍兵給三分  
官員承應人給二分多不過十貫凡前所收大鈔俟至  
通行當復計造其中須當精緻以圖經久民間舊鈔故  
暗者乞許于所在庫易新若官吏勢要之家有賤買交  
鈔而于院務換錢興販者以違制論復遣官分路巡察  
其限錢過數雖許奴婢以告乃有所屬默令其主藏匿



不以實首者可令按察司察之若舊限已滿當復更展十日許再令變易鈔引諸物是制既行之後章宗尋崩衛紹王繼立大安二年潰河之後至以八十四車為軍賞兵卹國殘不遑救弊交鈔之輕幾乎不能市易矣至宣宗貞祐二年二月思有以重之乃更作二十貫至百貫例交鈔又造二百貫至千貫例者然自泰和以來凡更交鈔初雖重不數年則輕而不行至是則愈更而愈滯矣南遷之後國威民困軍旅不息供億無度輕又其

馬三年四月河東宣撫使胥鼎上言曰今之物重其弊在于鈔室有出而無入也雖院務稅增收數倍而所納皆十貫例大鈔此何益哉今十貫例者民間甚多以無所歸故市易多用見錢而鈔每貫僅直一錢曾不及工墨之費臣愚謂宜權禁見錢且令計司以軍須為名量民力微歛則泉貨流通而物價平矣自是錢貨不用富家內困藏鏹之限外弊交鈔屢變皆至寔敗謂之坐化商人往往舟運貿易于江淮間錢多入宋矣宋人以為

喜而宋人不禁也識者惜其既不能重無用之楮而又棄自古流行之寶馬五月權西安軍節度使烏陵阿與言關陝軍多供億不足所仰交鈔多取于京師徒成此繁費乞降板就造便又言懷州舊鑄錢鉅萬今既無用願貫為甲以給戰士時有司輕罪議罰率以錢贖而當罪不平遂命贖銅計贖皆以銀價為率六月勅議交鈔利便七月改交鈔名為貞祐寶券仍立沮阻罪九月御史臺言自多故以來全藉交鈔以助軍需然所入不及所

出則其價浸減卒無法以禁此自然之理也近用貞祐  
寶券以革其弊又慮既多而民輕與舊鈔無異也乃令  
民間市易悉從時估嚴立罪賞期于必行遂使商旅不  
行四方之物不敢入夫京師百萬之衆日費不貲物價  
寧不日貴耶且時估月再定之而民間價旦暮不一今  
有司強之而市肆盡閉復議搜括隱匿必令如估鬻之  
則京師之物指日盡而百姓重困矣臣等謂惟官和買  
計贓之類可用時估餘宜從便制可十二月上聞近京

郡縣多糴於京師穀價翔踴令尚書省集戶部講議所  
開封府轉運司議所以制之者戶部及講議所言以五  
斗出城者可闌糴其半轉運司謂宜悉禁其出上從開  
封府議謂寶券初行時民甚重之但以河北陝西諸路  
所支既多人遂輕之商賈爭收入京以市金銀銀價昂  
穀亦隨之若令寶券路各殊制則不可復入河南則河  
南金銀賤而穀自輕若直閉京城粟不出則外亦自守  
不復入京穀當益貴宜諭郡縣小民毋妄增價官為定

制務從其便四年正月監察御史田迴秀言國家調度皆資寶券行才數月又復壅滯非約束不嚴奉行不謹也夫錢幣欲流通必輕重相權散歛有術而後可今之患在出太多入太少耳若隨時裁損所支而增其所收庶乎或可也因條五事一曰省冗官吏二曰損酒使司三曰節兵俸四曰罷寄治官五曰酒稅及納粟補官皆當用寶券詔酒稅從大定之舊餘皆不從尋又更定捕獲偽造寶券官賞三月翰林侍講學士趙秉文言比者

寶券滯塞蓋朝廷將議更張而已妄傳不用因之抑遏  
漸至廢絕此乃權歸小民也自遷汴以來廢回易務臣  
愚謂當復置令職官通市道者掌之給銀鈔粟麥緡帛  
之類權其低昂而出納之仍自選良監當官營為之若  
半年無過及券法流通則聽所指任便差遣詔議行之  
四月河東行省胥鼎言交鈔貴乎流通今諸路所造不  
充所出不以術收之不無缺誤宜量民力徵歛以裨軍  
用河中宣撫司亦以寶券多出民不之貴乞驗民貧富

徵之雖為陝右若一體徵收則彼中所有日湊于河東與不歛何異又河北寶券以不許行于河南由是愈滯宰臣謂昨以河北寶券商旅賫販繼踵南渡遂致物價翔湧乃權宜限以路分今鼎既以本路用度繁殷欲徵軍須錢宜從所請若陝西可徵與否詔令行省議定而後行五月上以河北州府官錢散失多在民間命尚書省經畫之八月平章高琪奏軍興以來用度不貲惟賴寶券然所入不敷所出是以沒輕今千錢之券僅直數



錢隨造隨盡工物日增不有以救之弊將滋甚宜更造  
新券與舊為子母而兼而用之庶幾工物俱省而用不  
乏濮王守純以下皆憚改奏曰自古軍旅之費皆取于  
民向朝廷以小鈔殊輕權更寶券而復禁用錢小民淺  
慮謂楮幣易壞不若錢可久於是得錢則珍藏而券則  
亟用之惟恐破裂而至于廢也今朝廷知支而不知收  
所以錢日貴而券日輕然則券之輕非民輕之國家致  
之然也不若量其所支復歛于民出入循環則彼知為

必用之物而知愛重矣今徒患輕而即欲更造不惟信  
令不行且恐新券之輕復同舊券也既而隴州防禦使  
完顏窩及陝西行省令史惠吉繼言券法之弊窩請姑  
罷印造以見在者流通之若滯塞則驗丁口之多寡物  
力之高下而徵之吉言券者所以救弊一時非可流通  
與見錢比必欲通之不過多歛少支爾然歛多則傷民  
支少則用不足二者皆不可為今日計莫若更造以貞  
祐通寶為名自百至三千等之為十聽各路轉運司印

造仍不得過五千貫與舊券參用庶乎可也詔集百官  
議戶部侍郎鄂屯阿古禮部侍郎楊雲翼郎中蘭芝刑  
部侍郎馮鶚皆主更造戶部侍郎高夔員外郎張師魯  
兵部侍郎圖克坦鄂勒博皆請徵歛惟戶部尚書蕭貢  
謂當如舊而工部尚書李元輔謂二者可並行太子少  
保張行信亦言不宜更造但嚴立不行之罪足矣侍御  
史趙伯成曰更造之法陰奪民利其弊甚于徵徵之為  
法特徵于農民則不可若徵于市肆商賈之家是亦敦

本抑末之一端刑部主事王壽寧曰不然今之重錢輕  
券者皆農耳其歛必先于民而後可轉運使王擴曰凡  
論事當究其本今歲支軍士家口糧四萬餘石如使斯  
人地着少寬民力然後徵之則行之不難權貨司楊貞  
亦欲節無名之費罷閑冗之官或有請鑄大錢以當百  
別造小鈔以省費或謂縣官當擇人者獨吏部尚書溫  
特赫思敬上書言國家立法莫不備具但有司不克奉  
之而已誠使臣得便宜從事凡外路四品以下官皆許

杖決三品以上奏聞仍付監察二人馳驛往來法不必  
變民不必徵一號令之可使上下無不奉法如其不然  
請受重刑上以示宰臣曰彼自許如此試委之可乎宰  
臣未有以處而監察御史陳規完顏蘓呼交諍以為事  
有難行聖哲猶病之思敬何為者徒害人爾上以衆議  
紛紛月餘不決厭之乃詔如舊紆其徵歛之期焉未幾  
竟用惠吉言造貞祐通寶興定元年二月始詔行之凡  
一貫當十貫增重偽造沮阻罪及捕獲之賞五月以鈔

法屢變隨出而隨壞製紙之桑皮故紙皆取於民至是又甚艱得遂令計價但徵寶券通寶名曰桑皮故紙錢謂可以免民輸輓之勞而省工物之費也高汝礪言河南調發繁重所徵租稅三倍於舊僅可供億如此其重也而今年五月省部以歲收通寶不充所用乃於民間歛桑皮故紙鈔七千萬貫以補之又太甚矣而近又以通寶稍滯又增兩倍河南人戶農民三之二今年租稅徵尚未足而復令出此民若不糴當納之租則賣所食

之粟倉此將何得焉今所急而難得者爲糧也出於民  
而有限可緩而易爲者交鈔也出於國而可變以國家  
之所自行者而強求之民將若之何向者大鈔滯則更  
爲小鈔小鈔弊則改爲寶券寶券不行則易爲通寶變  
制在我尚何煩民哉民既悉力以奉軍而不足又計口  
計稅計物計生殖之業而加徵若是其剥彼不能給則  
有亡而已矣民逃田穢兵食不給是軍儲鈔法兩廢矣  
臣非於鈔法不加意非故與省部相違也但以鈔滯物

貴之害輕民去軍飢之害重爾時不能用三年十月省  
臣奏向以物重錢輕犯賊者計錢論罪則太重於是  
以銀為則每兩為錢二貫有犯通寶之賊者直以通寶論  
如因軍興調發受通寶及三十貫者已得死刑進以金  
銀價纔為錢四百有奇則當杖輕重之間懸絕如此遂  
命准犯時銀價論罪三月參知政事李復亨言近創犯  
通寶之賊者並以物價折銀定罪每兩為錢二貫而法  
當贖銅者止納通寶見錢亦乞今依上輸銀既足以懲



惡又有補于官詔省臣議遂命犯公錯過悞者止徵通  
實見錢贓污故犯者輸銀四年十二月鎮南軍節度使  
溫特赫思敬上書言錢之為泉也貴流通而不可塞積  
於官而不散則病民散于民而不斂則闕用必多寡輕  
重與物相權而後可大定之世民間錢多而鈔少故貴  
而易行軍興以來在官殊少民亦無幾軍旅調度悉仰  
于鈔日之所出動以萬計至于填委市肆能無輕乎不  
若弛限錢之禁許民自採銅鑄錢而官製模範薄惡不

如法者令民不得用則錢必日多鈔可少出少出則貴而易行矣今日出益衆民日益輕有司欲重之而不得其法至乃計官吏之俸驗百姓之物力以歛之而卒不能增重曾不知錢少之弊也臣謂宜令民鑄錢當歛鈔者亦聽其輸銀民因以銀鑄錢為數等文曰興定元寶定直以備軍賞亦救弊之一法也朝廷不從五年閏十二月宰臣奏向者寶券既弊乃造貞祐通寶以救之迄今五年其弊又復如寶券之末初通寶四貫為銀一兩

今八百餘貫矣宜復更造典定寶泉子母相權與通寶兼行每貫當通寶四百貫以二貫為銀一兩隨處置庫許人以通寶易之縣官能使流通者則進官一階陞職一等其或姑息以致壅滯則亦追降的決為差州府官以所屬司縣定罪當命監察御史及諸路行部官察之定撓法失糾舉法失舉則御史降決行部官降罰集衆妄議難行者徒二年告捕者賞錢三百貫元光元年二月始詔行之二年五月更造每貫當通寶五十又以綾

印製元光珍貨同銀鈔及餘鈔行之行之未久銀價日  
貴竇衆日賤民但以銀論價至元光二年竇衆幾於不  
用乃定法銀一兩不得過竇衆三百貫凡物可值銀三  
兩以下者不許用銀以上者三分為率一分用銀二分  
用竇衆及珍貨重竇京師及州郡置平準務以竇衆銀  
相易其私易及違法而能告者罪當有差是令既下市  
肆盡閉商旅不行朝廷患之乃除市易用銀及銀竇衆  
私相易之法然上有限用之名而下無從令之實有司

雖知莫能制矣義宗正大間民間但以銀市易天興二年十月印天興寶會於蔡州自一錢至四錢四等同見銀流轉不數月國亡

金史卷四十八